

四庫全書

集部

欽定四庫全書

稼村類藁卷十七

元 王義山 撰

講義

九卦十三卦

洪平齋云易有九卦善一身十三卦善天下嘗因易而求之書九卦正德之事也十三卦利用厚生之事也試以九卦言履德之基也聖人既踐實地以履是德矣而

無以執之懼其易於轉移也於是乎謙以為之柄既有  
所執矣而無以定之懼其流於放肆也於是復以為之  
本既有所本矣而無以固之懼其本之搖也於是乎恒  
以為之固既固矣可自足乎必有以損己之欲以修其  
德既修矣而又益己之善以裕其德既裕矣聖人猶不  
敢自己也猶謂夫天下之事安得其常通而不至於困  
也聖人於此既有以取乎井之冽而不食使在我者常  
清又有取乎巽之順而能直使在我者不撓以是為處

困之道而德之基益壯矣非書所謂正德之事者乎若夫利用厚生之事則吾於十三卦有考焉古者庖犧氏之王天下也作結繩以為網罟以佃以漁蓋取諸離庖犧氏沒神農氏作斲木為耜揉木為耒耜之利以教天下蓋取諸益日中為市而致天下之民聚天下之貨交易而退各得其所蓋取諸噬嗑庖犧以前未有耒耨也於是為之網罟使斯民享田漁之利至神農之時始教之以耒耨而民有食矣而不皆有也於是乎合天下

之民聚日中之貨使斯民交易以通其有無此庖犧神  
農氏之易作非書之所謂厚生之事乎神農氏沒黃帝  
堯舜氏作誠謂夫上古聖人既有以厚民之生而未有  
以便斯民也是以脩物致用立成器以為天下利自乾  
坤以至於夫皆所以開物成務以前民用者也楊誠齋  
之說曰自斯人之寒而皮未知織組之製也於是乎作  
衣裳自斯人之出入阨於川隔而道斷也於是乎作輪  
轡自斯人之虞於寇攘而懈於守禦也於是乎作門柝

自斯人之知有耕耨而未知舂作也於是乎作杵臼自  
斯人無爪牙以自衛而憂於搏噬也於是乎作弧矢自  
斯人穴處而病於濕也於是乎作宮室自斯人死而戚  
於藁裡之掩也於是乎作棺槨自斯人之苦於結繩而  
無冊籍也於是乎作書契是皆制物尚象以便斯民而  
百姓莫不日用而不知者此黃帝堯舜之易非書之所  
謂利用之事乎嗟乎書言正德利用厚生而其事乃俱  
載於易學者可不深考乎然利用厚生皆始於正德故

書曰德惟善政自德而政政即利用厚生之事也抑又論之以十三卦而論由後九卦言之無非脩物以為民用由前三卦而言之於此益見聖人所以為民立命之意學者尤當於書求其旨今觀佃漁之取於離即所謂奏鮮食耒耨之取於益即所謂奏艱食也交易之取於噬嗑即所謂懋遷有無也嗚呼善觀易當觀之書

子夏之門人問交於子張子張曰子夏云何對曰子夏曰可者與之其不可者拒之子張曰異乎

吾所聞君子尊賢而容衆嘉善而矜不能我之大賢歟於人何所不容我之不賢歟人將拒我如之何其拒人也

觀子張問交一段全是聖人氣象孰謂子張而有是言哉子游則曰吾友張也為難能也然而未仁曾子則曰堂堂乎張也難與並為仁矣以難能難與之人而能發尊賢容衆嘉善矜不能之語何也蓋嘗攷之而得其說矣子張嘗問仁於夫子夫子曰能行五者於天下為仁



矣請問之曰恭寬信敏惠恭則不侮寬則得衆信則人任焉敏則有功惠則足以使人夫子答子張頭兩句便是箴之子張侮人者也夫子訓之以恭子張不能得衆者也夫子訓之以寬如信敏惠皆所以救其偏而進之道何者不恭則何以尊賢而嘉善不寬則何以容衆而矜不能以子張而有尊嘉矜容之語竊意在夫子答問仁之後有以變化其氣質故今日之子張非前日之子張矣子游曾子所以病子張者竊意在子張未問仁之

先自子張領會夫子為仁之旨賢則尊之善則嘉之非  
自恭則不侮中來歟衆則容之無能則矜之非自寬則  
得衆中來歟學者惟見其為恭寬之子張而不見其為  
難能難與之子張聖人之善於化人氣質如此夫仁與  
天地萬物為一體而斯人者與我並生於天地間者也  
君子一身斯人之責萃焉斯人也皆我也我豈能以絕  
夫人哉此子張之所以謂我之大賢歟於人何所不容  
我之不賢歟人將拒我如之何其拒人也子張蓋知夫

人即我也不敢以我而絕夫人也非絕人也自絕也夫  
以人視人則與我為二以我視人則人與我為一嗟夫  
人而賢也彼自賢耳人而善也彼自善耳於我乎何與  
而我乃尊之嘉之何也人之賢我賢也人之善我善也  
我而尊之尊我也我而嘉之嘉我也人而為衆人也彼  
自衆人耳人而不能也彼自不能耳於我乎何恤而我  
乃容之矜之何也人之為衆人我為衆也人之不能我  
不能也我而容之容我也我而矜之矜我也嗚呼孰謂

子張有是言哉子張自聞恭則不侮之語然後知所以尊賢所以嘉善子張自聞寬則得衆之語然後知所以容衆所以矜不能吁非夫子之教則難能難與之子張豈知恭寬之為仁也哉甚矣人之氣質不可無所化也亦甚矣聖人化人之速也大抵聖賢生世皆有天命人窮之責以斯人之即我幸而為賢為善者何少不幸而為衆人為不能者何多子張則曰皆我也吁非聖人孰能變子張之氣質哉自夫世人之狹於待夫人也其於

人之賢者則曰彼未必賢於我也其於斯人之善者則曰彼未必善於我也我而忽之忌之可也其於斯人之衆人則曰彼不如我也其於斯人之不能者則曰彼何足與於我也我而斥之棄之可也嗟乎何其狹於待人也子張未聞恭寬以前雖同門之子游曾子且難之子游則曰難能曾子則曰難與斯人也敢近之哉及其聞夫子之言則又一子張矣先儒謂子張外有餘而內不足故門人皆不許其為仁此未聞恭寬以前之子張也

惟其外有餘故一聞斯言而即變非特夫子之言也嘗  
讀秦誓而有感夫古人之用心也古之人其心休休焉  
其如有容焉人之有技若己有之人之彥聖其心好之  
夫人之彥聖而好之其有技者若己焉其為尊賢嘉善  
之意至矣而猶休休焉其為容矜之意藹然言意之外  
寧有一毫忿嫉于頑之意哉孰謂子張而知此意乎雖  
然子張之取友固不失為皇極并包兼容之道子夏之  
可者與之不可者拒之截乎其嚴者取友必端之意也

夫子嘗謂曾子曰商也日盈賜也日損曾子曰何謂也  
曰商也好與賢者處賜也說與不若已者處與賢者處  
可者與之也與不若已者處是不拒其不可者也可不  
可之間道之損益係焉此子夏之論所以截乎其嚴也  
此夫子所謂商也好與賢者處也嗚呼此商之所以為  
益歟

仲尼祖述堯舜憲章文武上律天時下襲水土譬  
如天地之無不持載無不覆幬辟如四時之錯

行如日月之代明萬物並育而不相害道並行而  
不相悖小德川流大德敦化此天地之所以為

大也

先儒謂鄉黨一篇寫夫子之真嘗讀鄉黨至閭閻如也  
此夫子之出辭氣自君在踧踖如也至私覲愉愉如也  
此夫子之動容貌自君子不以紺緌飾至齊必有明衣  
布所以紀夫子之服飾也自齊必變食至齊如也所以  
紀夫子之飲食也自席不正不坐至不親指所以紀夫



子之應事接物也雖然此以迹求聖人也聖人而以形迹求淺矣聖人其大造化乎門人之善形容者莫如子貢子貢曰他人之賢者丘陵也猶可踰也仲尼日月也無得而踰焉又曰夫子之不可及猶天之不可階而升也子貢以日月形容夫子盡矣乎曰未也門人之善形容者又莫如有若子貢曰自生民以來未有夫子也有若曰豈惟民哉麒麟之於走獸鳳凰之於飛鳥泰山之於丘垤河海之於行潦類也聖人之於民亦類也出乎

其類拔乎其萃自生民以來未有夫子也有若以山海形容夫子盡矣乎曰未也門人之善於形容者又莫如曾子曾子曰江漢以濯之秋陽以暴之皜皜乎不可尚已曾子兼江漢秋陽以形容夫子盡矣乎曰未也然則如何而可曰諸君于于然我我然登夫子之堂讀夫子之書徒見乎瞻之在前而不知所以在前為何如徒見乎仰之彌高而不知其所以彌高為何若徒見乎宗廟之美室家之好百官之富而不知其所以美所以好所

以富者為何在盡相與論聖人之大造化乎然則必如何而可以盡吾夫子也萃天地造化之大於夫子之一身其惟子思仲尼一章乎子思曰仲尼祖述堯舜憲章文武上律天時下襲水土辟如天地無不持載無不覆幬辟如四時之錯行如日月之代明萬物並育而不相害道並行而不相悖小德川流大德敦化此天地之所以為大也謂非萃天地造化於夫子之一身乎嗚呼盛哉此夫子之所以為夫子也堯舜之所以為堯舜文武

之所以為文武天地之所以為天地皆夫子分內事故  
曰祖述堯舜憲章文武上律天時下韻水土堯舜曰祖  
述以其道之所從出也文武曰憲章以其道之所由備  
也天時曰律如律調之也水土曰韻如服韻之也不時  
不食迅雷風烈必變律天時之事也居魯而縫掖居宋  
而章甫韻水土之事也財成輔相各遂其宜非有所增  
益也是道也充滿天地周流四時著明日月流動萬物  
皆並行而不相悖者也語其德之小則謂之川流語其

德之大則謂之敦化言天下無物不生育也如是則與  
天為一矣故曰此天地之所以為大也然子思此一章  
不特萃天地造化於夫子之一身抑且合乎子貢有若  
曾子諸子所以形容夫子者萃於一章而中庸前數章  
又皆總括乎此嗚呼盛哉此夫子之所以為夫子也試  
以中庸前數章考之舜之大知文王之無憂武王之達  
孝此中庸言舜文武也而此一章則言祖述堯舜憲章  
文武中庸雖不言堯而舜述堯者也非中庸之所謂堯

舜文武者乎悠久無疆此中庸言天時也不重不洩此  
中庸言水土也而此一章則言上律天時下脩水土非  
中庸之所謂天時水土者乎高明博厚此中庸言天地  
也至誠無息此中庸言四時也常久不已此中庸言日  
月也而此一章則言辟如天地之無不持載無不覆幬  
辟如四時之錯行如日月之代明此非中庸言天地四  
時日月者乎大哉聖人之道洋洋發育萬物此中庸言  
育萬物也而此一章則言萬物並育而不相害道並行

而不相悖此非中庸之所謂育萬物者乎淵淵其淵浩  
浩其天此中庸言達天德也而此一章則言小德川流  
大德敦化此非中庸之所謂達天德者乎以是觀天地  
造化之妙散見於中庸數章而皆總括於此一章又萃  
而歸之夫子之一身嗚呼盛哉此夫子之所以為夫子  
也夫子其集中庸之大成也歟何子思之善於形容也  
然則子思之形容夫子盡矣乎曰猶未也何也夫子太  
極也天地水土日月四時與夫川流敦化極其妙則無

體可求矣孰謂夫子而可以形體求乎抑嘗因是而有  
疑焉子思孔子之孫也為人之孫而字其祖何也子思  
蓋謂仲尼者六經之仲尼也千萬世之仲尼也吾豈敢  
私之以為已祖哉是又一孔安國先君孔子矣安國之  
稱先君是一家之孔子何其小吾夫子也或曰中庸何  
以稱仲尼者再也中庸第二章仲尼曰君子中庸小人  
反中庸子思所以繫仲尼於中庸之上者蓋以夫子集  
中庸之大成者也是以總括前數章天地造化之大而



歸於夫子之身況敢私夫子以為己祖哉嗟夫仲尼之為仲尼非孔氏一家之仲尼也六經之仲尼也千萬世之仲尼也嗚呼盛哉夫子嗚呼盛哉夫子此夫子之所以為夫子也

象曰天地交泰后以財成天地之道輔相天地之宜以左右民

泰其上古之極治也易十變而成泰開闢之世也屯蒙鴻荒之世也需訟結繩之世也師比阪泉涿鹿之世也


畜履書契之世泰其唐虞雍熙之世乎因是而推唐虞  
春也溫溫乎其和也夏假也假者大也長養之時也故  
虞書言夏之政其善在養民商秋也摯斂之時也故先  
儒言商之政嚴厲而駿發周冬也天運一周成一歲也  
然則四時之運其遂窮矣乎曰窮而不窮也周而復始  
也春而夏夏而秋秋而冬冬而又春也然而周以後柰  
何不常春也嗚呼安得挽三代以後之天下而春之夫  
以四時配唐虞夏商周亦猶康節以十二時配元會運

世上下數千萬年也謹按周易一陽之生於時為十一月於卦為復二陽之生於時為十二月於卦為臨三陽之生於時為正月於卦為泰蓋嘗攷之易六十四卦一卦具一象一象具一事惟泰之象兼三才而言他卦則皆指一事而言也泰之象曰后以財成天地之道輔相天地之宜以左右民聖人中三才而立以財成輔相左右之責萃而歸之一身財成者何因天地之道而均以節之之謂輔相者何因天地之宜而順以導之之謂左

右者何天之生民作之君以為之司命也嘗愛橫渠有云為天地立心為生民立命為萬世開太平斯言也惟泰足以當之泰之所謂財成輔相者是為天地立心也泰之所謂左右民者是為生民立命也夫如是則能為萬世開太平矣泰於月為正書言月正元日則正中有元也泰雖不言元亨而未嘗不言元吉橫渠言為天地立心為生民立命為萬世開太平而又繼之以為前聖繼絕學審吾道之絕續又泰否之所關雖然主張吾道

其惟泰之君子乎泰之象曰天地交而萬物通也上下  
交而其志同也誠齋嘗謂泰之為泰可以一言盡者交  
而已然而泰之彖象三言交而六爻不言交何也嘗攷  
之泰六爻雖不言交而九三一爻言際際交際也九三  
一爻介乎陰陽交際之間故九三之象曰天地際也交  
者何陰陽之界限君子小人之所攸分也否則變而為  
否矣今泰之君子固已在內而白駒空谷猶有人焉易  
曰拔茅茹以其彙征吉泰之初九也繼今以往儻能盡

天下之君子朝取一人焉拔其尤暮取一人焉拔其尤  
泰不在茲乎



稼村類藁卷十七

# 欽定四庫全書

集部

稼村類藁卷十八至二十

詳校官中書臣孫溶

主事臣呂雲棟覆勘

總校官庶吉士臣朱鈴

校對官編修臣秦泉

謄錄監生臣李天相



欽定四庫全書

稼村類藁卷十八

元 王義山 撰

講義

伊尹曰天之生此民也使先知覺後知使先覺覺後覺也予天民之先覺者也予將以斯道覺斯民也非予覺之而誰也

按伊尹此語萃天下之責於一身而不辭如所謂非予

覺之而誰者此語尤緊切直以天下之愚由已當是時  
任天下之責者也湯大聖人也伊尹則曰其責不專在  
湯也嗟夫天下之人於伊尹乎何與而伊尹若是哉天  
下之大有一夫不獲者伊尹則曰時予之辜凡當時之  
不獲者皆未覺者也天下之人有匹夫匹婦不被堯舜  
之澤者伊尹則曰若已推而內之溝中凡當時之不被  
堯舜之澤者皆未覺者也舉天下什百千萬覺矣而有  
一未覺焉若未甚害也伊尹若無所容其身自謂有餘

責矣此伊尹所以不曰予天民之先覺則曰予將以斯道覺斯民又直截謂非予覺之而誰伊尹凡二言予者蓋盡以其責歸諸已也以已之昭昭使人之昭昭盛哉伊尹厚待斯人之心也嗚呼不有先覺誰開我人夫人未有不具知覺以生者特所覺有先後耳先覺如伊尹豈忍視天下之未覺而若是恕哉孟軻氏謂伊尹自任天下之重如此天下湯之天下也伊尹以湯之天下為已任若無與於湯者嗟夫天下固湯之天下也伊尹何

敢諉其責於湯而曰非我也湯學於伊尹湯亦待伊尹而覺也天下之任有重於此乎嘗怪韓愈原道有曰堯以是傳之舜舜以是傳之禹禹以是傳之湯湯以是傳之文武周公文武周公傳之孔子孔子傳之孟軻而伊尹則無與焉愈豈知道者張無垢曰堯舜禹以後湯以前全是伊尹接得來中間無伊尹斯道之脈果誰繼堯舜禹以後湯以前伊尹是一箇大接頭孟軻氏論道統五百餘歲而一傳自堯舜禹以至湯兼伊尹而言愈置

伊尹於不論非知道者真西山謂愈本不知道因作文以見道誠哉是言使原道而曰堯以是傳之舜舜以是傳之禹禹以是傳之伊尹伊尹以是傳之湯吾何尤嘗以書考之伊尹之先覺不特覺當時之人且覺天下後世自孔孟後以至近世大儒其格言大訓多出於伊尹五篇之書人但知性相近也習相遠也性習之說自夫子始不思茲乃不義習與性成則性習之說伊尹曾說來人但知剛健篤寔光輝日新其德日新之說自湯始

不思終始如一時乃日新則日新之說伊尹曾說來人  
但知君子以常德行習教事常武美宣王有常德常德之  
說自易與詩始不思常厥德保厥位則常德之說伊尹  
曾說來人但知孝弟為仁之本又曰仁之實事親是也  
義之實從兄是也事親從兄與夫孝弟之說自孔孟始  
不思立愛惟親立敬惟長則事親從兄與夫孝弟之說  
伊尹曾說來近世大儒有主一之說不思德無常師主  
善為師善無常主協於克一則主一之說伊尹又曾說

來有不貳以二不參以三之說不思德惟一動罔不吉  
德二三動罔不凶則不二不三之說伊尹又曾說來若  
夫曰先知曰先覺曰天民其說皆始於伊尹真西山謂  
學之一字自說命始不知師之一字又學之所從出前  
乎典謨所未發而伊尹發之伊尹所以詔來世開後學  
者不特先儒不能外雖孔孟六經不能外也謂非先覺  
可乎然吾既責韓愈原道不及尹又深不取乎愈之不  
知尹為任道之重觀其上宰相書曰古之君子相其君

也一夫不獲若已推而內之溝中是知有伊尹矣而止以相業稱豈知道者耶知尹者惟孟軻氏其言伊尹任天下之重者凡三既曰其自任以天下之重如此又曰其自任以天下之重也又曰伊尹聖之任學者徒知所謂任而不知所以任嘗考之書伊尹言尹必言躬於太甲則曰惟尹躬克左右厥辟宅師又曰惟尹躬先見於西邑夏於咸有一德則曰惟尹躬暨湯夫言尹必言躬伊尹蓋謂任天下之重者身也吾豈敢私其身為已之



身身者天下之身也不然伊尹何以曰吾豈若於吾身  
親見之哉所以言尹必言躬也不特言尹必言躬又曰  
惟尹躬惟者我所獨也前兩箇惟字其毅然自任畧不  
少遜即孟軻氏當今之世如欲平治天下舍我其誰之  
誰猶所謂非予覺之而誰之誰後一箇惟字不過言與  
湯同一德而已即夫子謂顏淵曰惟我與爾有是夫之  
惟伊尹三言惟尹躬而兩歸之已孟軻氏謂其任天下  
之重而又曰自自者人不能任而惟我獨任之謂也曾

子曰士不可以不弘毅任重而道遠仁以為己任不亦重乎曾子論任重而歸之道伊尹自任以重而亦歸之道有以異乎無以異也抑嘗於書而有疑焉說命曰昔先正保衡作我先王乃曰予弗克俾厥后為堯舜其心愧恥若撻於市孟軻氏亦曰伊尹以堯舜之道干湯又嘗舉伊尹之言曰與我處畎畝之中以樂堯舜之道吾豈若使是君為堯舜之君哉吾豈若使是民為堯舜之民哉夷考伊尹五篇之書曾無一語及堯舜豈偶遺之

耶抑告湯堯舜等語在逸書中耶不然傳說孟軻氏之說為溢美耶竊意湯學於伊尹非從事乎口耳之學而尚書所不載者皆不可言傳之妙也嗚呼伊尹任天下之重以身而所以覺成湯者當於何求曰在心

湯誥曰惟皇上帝降衷于下民若有恒性克綏厥猷惟后泰誓曰惟天地萬物父母惟人萬物之靈亶聰明作元后

董仲舒曰道之大原出於天而堯受之堯授舜舜授禹

三聖相授守一道也蓋嘗論之堯之授舜則曰咨爾舜  
允執厥中堯只說出一箇中字於是中之名立道之名  
未有也至舜則曰人心惟危道心惟微惟精惟一允執  
厥中舜於中之外又說出一道字於是道之名立舜於  
道之外又說出一箇心字所謂性理等說未有也古今  
論斯道之相授受必曰堯舜禹至湯武則曰二聖人以  
征伐取天下豈知二聖人有功於斯道甚大皆堯舜禹  
之所未嘗言近世真西山雖能為湯誥發明而不及武

王武王泰誓中語學者又只作誓師等語讀過試與諸君評之按尚書湯誥曰惟皇上帝降衷于下民若有恒性克綏厥猷惟后斯言也前乎典謨未發也千餘年後子思得之為中庸西山云中庸首章全是總括此數語中庸曰天命之謂性即惟皇上帝降衷于下民也率性之謂道即若有恒性也修道之謂教即克綏厥猷惟后也讀中庸者誰知自湯發之泰誓曰惟天地萬物父母惟人萬物之靈亶聰明作元后斯言也前乎典謨訓誥

未發也二千餘年後橫渠得之為西銘西銘起語全是  
總括此數句乾稱父坤稱母即惟天地萬物父母也民  
吾同胞物吾與也即惟人萬物之靈也大君者吾父母  
宗子即亶聰明作元后也讀西銘者誰知自武王發之  
中庸子思所述先儒西銘與濂溪太極圖伊川易傳序  
春秋傳序是四件大文字二書之作其原皆始于湯武  
不特此也湯歸自亳作湯誥曰嗟爾萬邦有衆明聽予  
一人誥其在湯誥曰凡我造邦無從匪彛無即愾淫各

守爾典以承天休武王訪箕子乃言曰我聞在昔鯀湮  
洪水汨陳其五行帝乃震怒不畀洪範九疇彝倫攸斁  
禹乃嗣興天乃錫禹洪範九疇彝倫攸叙彝常也人受  
天地之中以生均有此常也即民之秉彝好是懿德之  
彝也二聖人於書一則曰彝典一則曰彝倫彝之一字  
又前乎堯舜禹之所未發者謂非上聖人大有功於斯  
道可乎今觀惟皇上帝降衷于下民若有恒性克綏厥  
猷惟后等語不特為子思中庸發端且為千萬世發出

一箇性字孟子謂堯舜性之湯武身之謂湯武身之可  
乎惟天地萬物父母惟人萬物之靈亶聰明作元后武  
王此語不特為西銘一篇綱領夫子作易乾父坤母之  
說亦自泰誓中來二聖大有功於斯道也如此

豐水有芑武王豈不仕貽厥孫謀以燕翼子

詩人言人才之盛多以水言菁莪之詩曰菁菁者莪樂  
育材也君子能長育人才則天下喜樂之矣其首章曰  
菁菁者莪在彼中阿釋者謂菁菁盛貌莪蘿蒿也中阿



大陵曰阿君子能長育人才如阿之長莪菁菁然也泮水之詩曰泮水頌僖公能修泮宮也其首章曰思樂泮水薄采其芹釋者謂泮水泮宮水也芹水草也樂僖公修泮宮之水而往觀之采其芹也詩人詠人材之盛而取諸水水哉水哉何取於水也嘗讀文王有聲之詩又知周家育材之盛芄芄然如芑也文王有聲不特為武功成而作其卒章則曰豐水有芑武王豈不仕貽厥孫謀以燕翼子夫曰莪曰芹曰芑皆非水不生活也嘗取

其詩而讀之一則曰既伐于崇作邑于豐豐邑之名自此始一則曰作城伊瀆作豐伊匹豐城之名自此始詩人之意蓋謂周家人材之盛辟猶芑生於豐水之中然表記又謂豐水有芑武王數世之仁者何也周自文武以至宣王數世矣宣王當四方既平之後正新美士習之一機故詩人又以芑歌之是芑也即豐水之芑也至宣王則又采是芑矣今吾之豐雖與周之豐不同然其為育材則一也吾黨之士盍亦相與歌曰維豐之水兮

清且漣漪士游其間兮挹彼注茲維豐之水兮清且淪  
漪士游其間兮其樂無涯維豐之水兮清且直漪士游  
其間兮相與泳思又歌薄言采芑兮于此新田其芑伊  
何可茹而漣漪言采芑兮于彼菑畝其芑伊何可擷而  
取薄言采芑兮于彼中鄉其芑伊何可掇其芳乃賡載  
歌曰昔我有周作邑于豐維我豐水與周攸同昔我有  
周作豐伊減維我豐水與周伊匹矧是豐水芑生其中  
寔茂且繁長育之功為豐之士者繼自今以往以淵淵

其淵浩浩其天者充此心之天以源泉混混不舍晝夜者養此心之源毋稂莠其志以傷此芑毋荒落其學以戕此芑毋揠苗助長以賊此芑將見豐水人材之盛不專美於周矣然水不在深有龍則靈越我豐水地靈人傑所以靈此水者有物焉夫物之靈者莫如劍而豐水之劍一曰龍泉一曰太阿蓋水而無劍無以靈此水劍而無水無以靈此劍異哉劍之所以靈者水也諸君氣軋斗牛韜光晦耀是猶劍之貯匣安知無夜半望氣者

即吾豐城而出之挽吾豐水而淬之劍得久貯於匣歟  
吾邑之士勉乎哉

有虞氏養國老於上庠養庶老於下庠夏后氏養  
國老於東序養庶老於西序殷人養國老於右  
學養庶老於左學周人養國老於東膠養庶老  
於虞庠

甲第紛紛厭梁肉廣文先生飯不足今廣文飽矣士且  
柰何哉雖然一飯耳士豈為一飯而來耶孟子曰無恒

產而有恒心惟士為能士固不為一飯而來也亦或者  
為一飯而來也飢來一字不堪煮有時乎不能無是餒  
矣然則士豈可以無養乎士不可以無養則養不可以  
無田養士尚矣以學則有虞氏養國老於上庠養庶老  
於下庠夏后氏養國老於東序養庶老於西序殷人養  
國老於右學養庶老於左學周人養國老於東膠養庶  
老於虞庠則學有異制以禮則有虞氏養以燕禮夏后  
氏養以饗禮殷人養以食禮周人兼修而用三代之禮

則禮有異宜然其為養則均也雖然此論養老耳至於  
四代之養士尤有當講明者焉或謂有虞氏所養止於  
老而不及士何則士之名典謨不載也三代始有士之  
名不特養老為然也或謂三代養士止於詩書禮樂養  
士之心而不及其身非不及乎其身也田井矣為士之  
家各已授田矣當是時何士非民何民非士其聚於學  
也自食其食而無所仰乎官學校以養士之心井田以  
養士之身學雖無田而家有田嗚呼士而為三代之士

何其幸歟三代衰校庠序皆廢齊一國耳且欲養弟子以萬鍾校庠序雖廢而猶幸養之名存漢人謂夫子養其徒三千雖事不經載然養之一字猶可為來者勸漢以東精舍所建贏糧而從者動千百計唐興廣學舍千二百區盛矣然所以養者何居洪平齋謂士生三代之時教養一出於上士生三代之後自養而自學嗚呼士而不得為三代之士可悲矣嘗謂自校庠序既廢之後學之或廢或興田之或有或無姑勿論猶幸家塾存焉



雖自養自學然儒者所以三綱五常扶植天地以至于  
今家塾力也嗚呼三代以前無地無學三代以後無家  
無塾盛哉家塾之有功於斯道也惟洪既建郡學矣又  
建東湖宗濂二書院矣於八邑之屬又建學焉教之者  
既有其地養之者又有其資果何負於爾士哉然竊嘗  
恠夫今之所謂養士者每日質明羣弟子趨而入大冠  
絺如大衫襜如坐而堯言起而舜趨其秀而甚文也相  
與坐於堂之下鼓而升颯颯如春蠶之食葉飯已則往

矣挑兮達兮在城闕兮嗚呼上之所以待士者何厚而士之所以自待其身者何薄耶雖然教而養上之厚於士也食而學士之厚其身也養而得其均職教者責也職教者盍曰維年之豐廩之充其比如櫛其崇如墉一粒以上當與同志共此春毋使或者得以議吾之不公為吾黨者盍亦曰志在溫飽兮其志毋乃卑尚論古人兮讀書而誦詩老者安之兮少者懷之朋友信之噫謀道不謀食兮豈一飯而能使吾之不餒而



稼村類藁卷十八

欽定四庫全書

稼村類藁卷十九

元 王義山 撰

講義

大哉乾元萬物資始乃統天

盈天地之間者惟萬物有胚胎此者有芽甲此者有萌  
蘖此者日發生不已日長育不已日充滿流動不已然  
則孰使之然哉元也元其萬物之一初乎是元也於四

時為春於五行為木於四端為仁生生之理無間可容  
息故易曰大哉乾元萬物資始資始者資之以始也故  
人君體元以居正命曰元命德曰元德其紀正朔則曰  
元年其出萬物之上則曰元首其為萬國之主則曰元  
后乾以此元而統天人君體此元而統天下噫此元之  
所以為大歟嘗因是而推之六爻矣伊川謂乾之初九  
潛龍勿用舜側微時也乾之九二見龍在田舜田漁時  
也乾之九三君子終日乾乾夕惕若厲无咎舜玄德升

聞時也乾之九四或躍在淵舜歷試諸難時也至乾之九五飛龍在天舜為天子矣伊川此說竊以為未盡然也嘗謂乾之六爻唯湯武當之初九潛龍勿用湯在亳武王在西土時也九二見龍在田湯使亳衆往為之耕武王觀政時也九三夕惕若厲无咎湯德言足聽聞武王夙夜祇懼時也九四或躍在淵湯升自陞武王戰于牧野時也至九五飛龍在天湯武為天子時矣藝祖時王昭素講乾至九五謂今日正當此爻亦猶是也何以

見湯武當此一爻乾文言釋九四一爻曰或躍在淵乾道乃革革革命之革也晦翁謂此一革非細有仙凡之異舜揖遜之時也非革之時也革之時惟湯武當之革之卦曰湯武革命順乎天而應乎人蓋乾道乃革正湯武革命之時而龍在天則天下利見乎大人矣或曰乾之大人以飛龍言革之大人以虎變言何也獨不觀之乾乎乾之卦曰雲從龍風從虎聖人作而萬物覩是以乾之功用極而至于天下平然萬國咸寧乃可以言天



下平之效有一不寧不可謂之咸亦不可謂之平矣必  
帝光天之下至於海隅蒼生萬邦黎獻共惟帝臣然後  
謂之咸寧謂之天下平萬國而有一國不為帝臣便不  
是咸寧便不是天下平必東漸於海西被於流沙朔南  
暨聲教然後謂之咸寧謂之天下平萬國而有一國不  
暨聲教便不是咸寧便不是天下平必我咸成文王功  
於不怠丕冒海隅出日罔不率俾然後謂之咸寧謂之  
天下平萬國而有一國不丕冒便不是咸寧便不是天

下平必自東自西自南自北無思不服然後謂之咸寧  
謂之天下平萬國而有一國不服便不是咸寧便不是  
天下平必黃支之南大夏之西東鞮北女來貢其琛然  
後謂之咸寧謂之天下平萬國而有一國不貢玆便不  
是咸寧便不是天下平必舟車所至人力所通天之所  
覆地之所載日月所照霜露所墜凡有血氣者莫不尊  
親然後謂之咸寧謂之天下平萬國而有一國不尊親  
便不是咸寧便不是天下平不特此也天地之間萬國

而有一國不在覆載之內不特不謂之咸寧不謂之天下平亦不可謂大人與天地合德日月之下萬國而有一國不在照臨之中不特不謂之咸寧不謂之天下平亦不可謂大人與日月合明中庸曰今天下書同文車同軌行同倫噫此乾所以統天歟天且統況萬國乎抑又因乾元而推元亨利貞四德矣先儒謂貞下起元愚謂此語猶淺不若云貞中有元蓋貞下起元則是貞已了元方來絕而續也貞中有元則是貞之往者未過元

之來者已續貞下起元是冬後遇春穀芽上占生意也  
貞中有元是冬裏藏春穀種內含生意也試以剝復明  
之復之陽生於十一月而復之生則起於十月之半十  
月雖為純陰而下半月已有陽矣非剝盡而陽方生也  
蓋靜中有動正所謂貞中有元也後天圖所以位乾於  
亥者蓋已窺造化之蘊矣忽然半夜一聲雷萬戶千門  
次第開若識無中含象許君親見伏羲來易生道也  
生則烏可已故曰生生之謂易

麗澤允君子以朋友講習

允之義何取乎謹按周易麗澤允君子以朋友講習伊  
川釋之曰麗澤二水相附麗也兩澤相麗交相浸潤互  
有滋益之象故君子觀其象而以朋友講習互相益也  
古今二水相附麗而有真益者莫盛於洙泗不特三千  
之徒蒙其澤百千萬世而下且蒙其澤也雖然此師友  
講習也大江以西二水相附麗為郡有二臨水與汝水  
相附麗於撫撫則有南湖書院章水與貢水相附麗於

賴賴則有濂溪書院吾洪既建東湖書院矣又建宗濂  
書堂曰湖曰濂皆水也前乎此時二書院離而不合今  
宗濂附東湖相附麗也嘗讀而有感焉詩人長育人材  
多以水言水哉水哉何取於水也菁莪之詩曰菁菁者  
莪樂育材也君子能長育人材則天下喜樂之矣其二  
章曰菁菁者莪在彼中沚釋者曰沚水也菁菁盛貌莪  
蘿蒿也君子長育人材如沚之長莪菁菁然也泮水之  
詩曰泮水頌僖公能修泮宮也其首章曰思樂泮水薄

米其芹釋者曰泮水泮宮之水也芹水草也樂僖公修泮宮之水而往觀之米其芹也二詩言長育人材皆取於水水哉水哉何取於水也然二詩止為長育人材設有長育而無講習人材雖盛不盛也學校莫盛於三代之來游亦莫盛於三代三代之時有不談王道者樵夫笑之焉有三代之士而無講習之素哉想夫菁莪之長養泮水之涵泳何往而非講習也然講習二字不可滾作一處看講是講明習是習熟故士君子之學於易

當講明其潔淨精微者於書當講明其疏通知遠者於詩當講明其溫柔敦厚者於禮當講明其恭儉莊敬者於樂當講明其廣博易良者於春秋當講明其屬辭比事者而又習射以尚功習鄉以尚齒習其所謂屈伸俯仰綴兆舒徐者習其所謂升降上下周旋裼褻者立如齋立時習坐如尸坐時習而又以論語之時習者習吾之學以坎之常習者習吾之教有講而無習可乎徒習而無講可乎信乎人不可以無朋友也雖然士君子之



學詎止此哉士君子之學其積也有源其發也無涯自  
泉之始達以至於彌滿六合自源泉混混以至於溥博  
如天淵泉如淵講習力也今吾於諸友遊於湖溪之上  
遐想子在川上之時涵泳乎逝者如斯不舍晝夜底意  
思所樂寧有既乎然則樂何在濂溪愛蓮者也蓮之盛  
莫盛於東湖濂溪愛蓮說作於宰南昌之日是愛東湖  
之蓮也宗濂今與東湖相附麗東湖之蓮又與宗濂共  
矣噫露之朝風之夕庸詎知濂溪翁不時為蓮一來耶

嗚呼噫嘻蓮花之君子兮光風霽月之與俱繼自今願  
與溪翁共之濯清漣而不妖兮吾何可以不如蓮之潔  
兮出於淤泥而不染兮吾何可以不如蓮之節兮亭亭  
淨植不蔓不枝兮吾何可以不如蓮之可遠觀而不可  
褻兮牡丹之愛兮衆人之所趨菊之愛兮如淵明者已  
希蓮之愛兮千古一人吾漁溪矧湖濂之士兮相與講  
於斯而習於斯使不能自潔以辱吾蓮兮得無愧於此  
水胡不曰彼澤之有蒹葭兮伊若人兮有美濂何人哉

兮希之則是

子張問曰令尹子文三仕為令尹無喜色三已之無愠色舊令尹之政必以告新令尹何如曰忠矣曰仁矣乎曰未知焉得仁

子謂顏淵曰用之則行舍之則藏惟我與爾有是夫夫聖人用舍行藏與天為一也顏子用舍行藏聽命於天矣聖賢氣象便有不同處然聖人所謂惟我與爾何耶聖人以已待顏子固有惟我與爾之辭學者以分量觀

聖賢不無去聖一間之異孟子論夫子可仕可止可久可速先儒謂便是母意母必母固母我底意思張無垢謂夫子仕止久速如春夏秋冬四時非與天為一乎或者則曰孟子於公孫丑言夫子仕止久速又於萬章言夫子速久處仕前一章先仕而後止久速後一章先速而後久處仕有以異乎嘗思而得之矣前一章所以言夫子之聖後一章指夫子去齊去魯而言今觀孟子論夫子去齊去魯一章去齊則曰接淅而行去魯則曰遲

遲吾行也去父母國之道也前一句直下便說可以速則速言夫子去齊嘗速也後三句却說可以久則久可以處則處可以仕則仕言夫子去魯之道也去父母國也不於此乎仕將奚仕哉不於此乎處將安處哉於此而不可久孰為可久哉夫子之出處何往非天也顏子則聽命於天矣顏子有王佐才而不得仕為邦之問四代之禮樂卒無所乎施至於陋巷人不堪其憂回也不改其樂顏子窮而在下惟天所命也士君子生斯世惟

天所命而安乎其天知命者也嗟夫道之將行也歟命也道之將廢也歟命也吾惟安吾天而已子張問曰令尹子文三仕為令尹無喜色三已之無愠色舊令尹之政必以告新令尹何如曰忠矣曰仁矣乎曰未知焉得仁令尹官名赫赫師尹之尹謹按春秋莊三十年子文為令尹僖二十三年楚成得臣帥師代陳取焦夷城頓而還子文以為功使為令尹莊三十年以後僖二十年以前子文三仕而已之時此子文為令尹之始末也

子文楚之上卿執政也其為令尹凡三仕當進而進無  
喜色凡三已當退而退無愠色子文若曰君而我用其  
進非苟進君而我棄其退當勇退柰何其喜且愠哉先  
儒謂用舍無與於已進退各安所遇曾無幾微見顏面  
子文其君子歟嗟乎仕者人之所榮彼有一進而喜心  
生焉沾沾自足者淺之為丈夫也子文若曰時行則行  
於我何與焉子文仕至於三而無喜色大耐官職也已  
者人之所惡彼一退而愠心生焉悻悻然怒者小之丈

夫也子文若曰時止則止於我奚損焉子文已至于三而無愠色寵辱不驚也子文其君子歟善觀子文者不在於三仕無喜色而在於三已無愠色仕者人情之所願欲也仕而喜人情之常也喜而不見於色深情厚貌者皆能之仕而復已已而復仕人情所甚不堪子文具奈何哉子文處人情甚不堪之時而甚安之若素所無者子文以令尹為楚之令尹不以為已之令尹此其所以難進而易退者君子也西山云士大夫進為難既進



矣退為難既退矣退而不忘君為難先儒謂子文知有國而不知有身退而不忘君者也使子路則愠見矣論語第一章便說出一箇愠字以人不知而不愠為君子嘗証之易遯世無悶不見是而無悶不見是未有不愠者易之君子方且樂以行之子文出處與易合子文其君子歟嗚呼聖人安得不以忠許之然而未也善觀子文者不在於三已無愠色又在於以舊令尹之政告新令尹夫行事而可以告人者必其人無愧於心者也司

馬公云某無一事不可對人言者趙清獻公每日所行事夜必焚香告之天子文以所為之政告新令尹必其為令尹之時無不可告人者使其不可以告人則不告矣惟其可以告人俯仰天地浩無愧怍此所以三去三來有面目以見楚國之人者為其無愧於此心也子文其君子歟嗚呼聖人安得不以忠許之然而未仁何也嗟乎仁豈易言哉仁者以天地萬物為一體先儒謂子文雖喜怒不形物我無間然未得純乎天理之公而無

人欲之私故曰未知焉得仁未知是絕句未知此仁焉  
得謂之仁鄭氏謂以知為智非也嗟乎仁豈易言哉使  
子文遊聖門為聖門之子文不為楚國之子文則去仁  
不遠矣惜乎其未也使子文純乎天理之公而無人欲  
之私則可以語仁矣惜乎其未也嗟乎仁豈易言哉然  
而聖人不許之以仁而許之以忠何也左氏謂子文為  
令尹自毀其家以紓楚國之難聖人不以忠與之而誰  
與哉嘗因是而考聖門之所謂仁雍也可使南面冉求

可使為百乘之宰公西華可使與賓客言子路可使治  
千乘之賦一門之中宗廟之美百官之富皆在焉聖人  
未嘗不許之以仕也然夷攷其時顏子之外惟閔子騫  
不仕顏閔之外惟曾子三世不仕西山謂人但知曾點  
無仕意不知自點而參自參而元不仕凡三世言未既  
有為東坡之歌者曰歸去來兮誰不遣君歸征夫非不  
指前路兮胡為皇皇欲何之三逕就荒松菊猶存童稚  
候門笑語嬉悅親戚之情話樂琴書以消憂兮但小窗

容膝閉柴扉噫雲出本無心兮其出未為非鳥倦方知  
還兮其還毋乃遲不如歸不如歸去細和淵明詩左手  
招灌翁高揖謝孺子兮歸歟歸歟歌闋有和而歌者曰  
士君子所學何學兮窮之所養者達之所施彼荷蕢而  
過門兮謂有心乎擊磬果何為嘆鳳德之衰兮又曷曰  
來者猶可追此逃世絕人以為潔兮吾惡桀溺與長沮  
欲潔其身而亂大倫兮君臣之義如何其廢之猗仕止  
久速兮吾夫子所以為聖之時於是二子相頷而笑曰

君請擇於斯二者

稼村類藁卷十九

欽定四庫全書

稼村類藁卷二十

元 王義山 撰

冊文奏劄

度宗謚冊

臣聞天地不難於模寫而難以盡其覆載之神日月不難於繪畫而難以狀其臨照之妙蓋有可擬議者功之淺未易形容者德之深所以名堯以放勳而放勳未足

以盡堯名舜以重華而重華未足以盡舜恭惟大行皇帝稟天粹之姿持日躋之敬粵自毓德青宮纂緒洪業念理皇付托之重而篤志三年之喪奉慈元怡愉之樂而竭誠四海之養用賢則不貳從諫則如流收召耆舊蒲輪絡繹於山林訓飭牧守奎翰昭回於雲漢經帷講讀寒暑弗輟昕庭臨御中昃不遑斥絕美人先出獨斷抑制閹寺卓冠前代戚畹無橫恩內廷無私宴宮室無所營繕服御無所增益佩服乎思無邪之訓以為正心



之本尊承乎母不敬之箴以為應天之忱宗廟之祀將  
以寅畏雨暘之禱極其精純崇尚理學款謁儒宮待士  
則優禮加於前取人則詞章倣乎古一刑之議三宥而  
行一事之為衆好必察蠲租賦則農願耕於野弛關權  
則商願出於塗褒諭將士謹固封守增口券以給足軍  
食置機速以專領邊防故越十餘年而如歷一日於是  
日星著明乾象無盪風雨調協百穀用成天道順也田  
里安居靡有愁嘆閭閻樂業咸遂生息民心固也官府

體一而奇衰者遠朝廷綱正而奸慝者消官聯肅也庶  
尹交修百職無曠僥倖者不得越紀而干恩廢黜者不  
得徇情而揜過上下定而法度舉也儒道昌明文治彪  
蔚詞章之粹黼黻乎皇猷庠序之盛弦歌乎郡邑教化  
行而禮樂彰也是皆尊先覺之賢如成湯之於伊尹守  
無逸之戒如成王之於周公用能志大有為履率無越  
莫麗陳教則肆用弘濟於艱難方將運乾剛之德迎泰  
治之機修車脩器會東都而復境土鳴玉曳履開明堂

而受朝賀幅裂之地再混乎車書黔愚之民重歸乎版  
籍然後灌甘泉之烽偃靈臺之鼓銘旆常彛鼎同律度  
量衡使制作軼乎三王功烈冠乎五帝開太平之基遺  
無窮之福夫何白雲天仗絳闕宸遊痛車馭之難攀對  
美牆而如割閔予小子未堪多難嗣有大統凜懼弗克  
因山有期同軌畢集列辟一辭太常合議以節大惠以  
揚鴻烈以見于南郊以對于天下人謀僉同帝意允協  
鏤以玉冊藏之金匱昭示大公用垂無窮謹遣右丞相

卷二十  
兼樞密使臣某奉寶冊以聞伏惟皇靈在天昭格如對  
俯膺駿典誕錫嘉祉奕葉丕承永永流祚嗚呼哀哉

乙亥三月上殿輪對

臣恭惟聖朝藝祖皇帝建隆三年二月詔百官以次輪  
對直書其事指陳得失既有以開千萬世之丕基高宗  
皇帝紹興二年五月中嚴建隆百官輪對之制復有以  
建中天之洪業於戲盛哉肆我皇帝陛下當千一歲之  
昌期紹十五傳之正統聰明卓冠學問方新嗣歷之初

首以開言路為第一義天下莫不以建隆紹興時事望  
今日臣家世寒微學術膚淺四舉一第歷事三朝綴身  
班行叨竊踰分無以補報負此遭逢聖度天寬賢路日  
闢誠有以光先帝之德恢志士之氣遂俾愚臣亦獲望  
清光而抒愚慮風虎雲龍不世之遇此而不言臣則有  
負故敢先之以聖學為陛下告而事有關於方今之利  
病者次第陳之陛下幸垂聽焉臣嘗讀易至卦之蒙而  
有感於今日蒙之象曰蒙以養正聖功也先臣程頤釋

之曰未發之謂蒙以純一未發之蒙而養其正乃作聖之功先臣楊萬里則以為蒙以養正謂六五之君及考六五一爻則曰童蒙吉其象曰童蒙之吉順以巽也順又曰童取未發而資於人也為人君者能至誠任賢以成其功也萬里又曰六五以人君之尊秉巽順之德自居於童稚之蒙以下學於九二剛明之賢此聖人之蒙也聰明睿智而守之以愚者也若昔商之高宗嗣位之初以台德弗類而學於傳說周之武王即位之始以我

不知彛倫而訪於箕子茲聖人之所以為聖而蒙以養  
正之功所繇驗歟蒙之六爻惟二五爻為吉者豈非六  
五之君能以巽順自居而以養正之學責望於九二之  
賢九二之臣能以剛明自盡而以培養君德輔成六五  
之聖蒙之功用大矣哉臣不敢泛引洪惟我哲宗皇帝  
即位於元豐八年之三月此幼冲時也當時呂公著奏  
曰人君即位之始修德之要莫大乎學也范祖禹言進  
學莫不在於年少之時於是開講筵置講官既命日赴

資善堂雙日講讀矣而夜分復輪一負直宿異時既御  
通英殿講無逸徹章矣而復詔詳錄講義次日別進條  
陳十事始於畏天愛民終於去奢無逸者公著也取尚  
書論語孝經切於治道者百餘篇以進亦公著也言觀  
文鑒古圖三朝訓覽圖可以見帝王美惡之迹者祖禹  
也集仁祖訓典書以備觀覽且願以至誠好學為先者  
亦祖禹也蘇頌以為國家舊典大抵襲唐請采進唐書  
故事蘇軾以為陸贄論諫舉合事宜請取奏議進呈王



岩叟從容勸講其對聖問有曰須將先聖之言一一著  
心承當善者以為法不善者以為戒此帝王為學之要  
也夫人主之學非徒涉經史而已凡起居動作之間無  
非學也講學之地非徒曰經筵而已凡宮闈之中九重  
之邃視聽言動無一非禮而後可也講學之人非徒曰  
師保而已凡侍御僕從綴衣趣馬罔匪正人而後可也  
是以古先聖王兢兢業業雖在紛華波蕩之中幽獨得  
肆之地而所以精之一之如對神明如臨淵谷雖深宮

禁密之地而惕然若立乎宗廟之中朝廷之上雖以天子之尊周旋講讀之間而凜然若父師之臨乎前此學之所以成也哲宗皇帝聖學緝熙固諸儒勸講之功而程頤之告我哲宗則曰君德成就在經筵天下治亂在宰相此兩語尤為切要今觀頤之在經筵講顏子不改其樂一章曰人主崇高奉養備極苟不知學安能不為富貴所移顏子乃王佐之才而簞食瓢飲季氏魯國之蠹而富於周公魯君之用舍若此非天下後世之龜鑑

乎至如聞宮中不踐蟻則有願推此心及四海之言又  
奏輔導少主不宜踈畧乞命講官以六參日上殿問起  
居因得從容納誨願之在經筵其啓沃者如此信乎君  
德之成就在經筵也元祐新政起司馬光於洛首言上  
自伏羲下至周威烈王畧舉大要合為二十卷名曰稽  
古錄當時元臣碩輔其以聖學為重者又如此至如光  
之入相即以開言路為請疏曰近年風俗頽弊士大夫  
以偷合苟容為智以危言正論為狂是致下情蔽而不

上通上恩壅而不下達閭閻疾苦痛心疾首愚民往往怨歸先帝蓋以言路之通塞尤治亂之所關其論風俗一劄則又以公卿大夫好為高竒之論喜誦莊老之書流及科場亦相習尚口傳耳剽翕然成風乞下詔書戒厲內外他如進修身治國之要嚴居官久任之法縷縷言之以至論邊防利害則謂之文彥博輔佐四朝熟知邊情軍國重事願詢彥博以決之又如進安西邊二策則又曰今國家理財未得其道民力困窮於下府庫窘

乏於上新遭大喪山陵纔畢萬一激怒西人微出一不  
遜語則臣之策不可行矣光於未明入相之時應詔一  
書已曰執政大臣所以輔佐陛下者未得其道歟所以  
未得其道者在於好人同己而惡人異己也然則天下  
之治亂不在宰相乎臣願陛下仰法元祐之盛責宰相  
以輔聖政重經筵以崇聖德開蒙亨之治去蒙蔽之習  
則今之德祐即昔之元祐也然臣又有不容已於言者  
竊謂今日之初政固與元祐同今日之國勢則與元祐

異元祐初元詔范純仁呂大防條具邊計純仁以明探敵情為對大防以敵無能為言未幾而西使請和鬼章就擒矣尚論今日之事勢不當以治亂言直當為安危計也長江天險一葦杭之三百年社稷寄命督府陛下當幼冲之年太皇享怡愉之奉軍國之事悉委中書二三大臣拱手受成於督府日伺消息苟延旦暮設施措置一切稟命而行昔聞邊聽於廷今則邊大廷細矣不料督府師潰朝臣愕眙相視今日都堂聚議明日臺

諫上章言遷者非守言守者非遷築室道傍人各一喙  
凡前日之聽命於督府者轉而歸罪於督府矣江上之  
連城披靡長沙之重鎮孤危通國上下彷徨無措遷守  
二議迄無定主但聞侍從某人遁卿監即曹某人遁祖  
宗三百年待士大夫之厚今日獲報乃如此耶政府大  
臣依違不斷臺諫諸人方且肆為大言各植私黨以妬  
賢嫉善為能以假公行私為得以擠人揚己為巧因其  
身居言路先遣其妻孥於數百里之外者是不以天若

祚宋存心矣謀已則善國將柰何彼為守之說者則為宗廟之重生靈之衆非可以一日棄不思京師浩穰之地衆大之區米仰於蘇薪給於嚴萬一有扼吾蘇與嚴則六軍萬姓何所仰乎又自南渡建都以來晏安一隅池壁湮圯深不踰尺褰裳可涉高不過仞不梯可升一旦事出不測欲待种師道之至得乎遷之說固未易言也彼以遷為不便者往往又謂皇皇京邑天下本根本根一搖天下震動然而人主一身足以為天下之勢乘



與所在所以繫忠臣義士之望懾亂臣賊子之心四方  
勤王之師雷動雲合氣勢翕張彼之望風迎拜者不至  
靡然從之也但恐某曰幸金陵某曰幸蜀距止渡河而  
後議論定哉臣職司教胄敢於肆言天下事萬死猶輕  
然區區愚衷忱以為一祖十五宗之德澤方深億萬年  
之天眷未艾猶有恃者所以先之以聖學為陛下告而  
切于今日之利病者痛陳于前願陛下擇於二者申飭  
大臣亟圖之臣不識忌諱惟陛下裁赦

第二劄

臣讀胡安國春秋傳有曰即位之一年必稱元年者明  
人君之用也大哉乾元萬物資始天之用也至哉坤元  
萬物資生地之用也成位其中與天地參故體元者人  
主之職元即仁也易曰元者善之長釋之者曰乾之元  
物資以始坤之元物資以生始者氣之元生者形之元  
父母之道也天地為萬物父母元后作民父母元仁也  
程頤曰專言之則一事合而言之則包義禮智三者易

六十四卦惟泰為得乾坤之元天氣下降地氣上騰故  
為地天泰泰之一字合三才而並言其曰后以財成天  
地之道輔相天地之宜以左右民六五君位也中天地  
而一人者也六五之爻曰元吉體乾坤之元以覆載民  
者也易言元亨者四言元吉者十三言元亨利貞者七  
姑畧言之得乾之離者為過惡揚善以順天命之大有  
得坤之巽者為順德積小以高大之升得乾之坎者為  
作事謀始之訟得乾之兌者為辯上下定民志之履得

坤之震者為見天地心之復得坤之亢者為教思無窮  
容保民無疆之臨放而準之使天得以清地得以寧萬  
物得以化生天下得以治平皆此元也自古帝王即位  
之一年必稱元年未有所謂年號改元始於漢武帝始  
改為建元再改而元光三改而元朔四改而元狩獨不  
書元朔改元之由者蓋自建元至元封率六年而改元  
元光之後久無天瑞故六年而復更始然此特論武帝  
改元之始耳非謂人君即位之初必改元也恭惟藝祖

皇帝開無疆之基以建隆為初元又改元乾德時元年  
癸亥也哲宗皇帝即位於元豐八年之乙丑是年下詔  
其以明年正月一日為元祐元年嘗考藝祖皇帝之平  
江南平湖南皆乾德元年之事哲宗皇帝相司馬光雖  
見於乙丑即位之初然丙寅之春即下恤刑之詔下舉  
監司之詔絕內降戒掊刻政治條貫一一施行文彥博  
以平章軍國重事赴經筵皆所以輔成聖德而新美聖  
治也臣讀國史每嘆聖祖之業垂後裔神孫之功光祖


宗以縣延億萬年敬天之休恭惟聖朝春王三朝改元  
德祐正有取乎藝祖皇帝之乾德哲宗皇帝之元祐臣  
願陛下以藝祖皇帝哲宗皇帝之心為心今日之大臣  
以趙普文彥博司馬光之心為心將見德祐之治復如  
乾德元祐之時前乎千萬世之已往以此而續後乎千  
萬世之方來以此而新車同軌書同文為父為母億萬  
斯年又自今日始抑臣又有證焉高宗皇帝初即位改  
元建炎五年改紹興孝宗皇帝即位踰年改元隆興其

說以為務隆紹興之政及學士草制則合建隆紹興之義非初意也後改元淳熙言欲致淳化雍熙之美十六年光宗皇帝即位將紹淳熙之政遂以紹熙紀元猶隆興意爾而學士草制則又合紹興淳熙為義亦非初意也今德祐建元實有取乎乾德元祐之義非若隆興紹興比也然論今日之事則不當以元祐望今日直當以乾德望今日也藝祖皇帝聰明神武繼天立極創業之始雖在建隆而消平僭叛混一區宇則在乾德今天下

事勢又有難言者矣火寢薪而有及然之憂澤滅木而有過涉之咎臣願陛下體乾之剛運乾之元以乾乾夕惕為心以自強不息為政書曰惟克天德自作元命又曰其惟王位在德元王其德之用祈天永命元德天德即所謂乾德也皆純乎陽者也皆足以繫天命而守天位也方今之勢正病積弱惟乾健足以起之允若茲則將見為乾之保合太和為乾之萬國咸寧為乾之能以美利利天下盛德大業功光創造豈特元祐之治而已



哉惟陛下留神臣不勝惓惓



稼村類彙卷二十

# 欽定四庫全書

集部

稼村類藁卷二十一至三

詳校官中書臣孫溶

主事臣呂雲棟覆勘

總校官庶吉士臣朱鈴

校對官編修臣秦泉

謄錄監生臣李天相

欽定四庫全書

稼村類藁卷二十一

元 王義山 撰

牋表疏狀醺詞

代江西運司賀乾會節表

龍御中天正位凝鼎虹流華渚嘉會合乾後慈闈一日  
而生罄寰宇三呼之祝恭惟剛健純粹篤實輝光禹立  
三年百姓以仁遂舜明四目萬邦惟帝臣時維孟夏之

初節屆千秋之候舉仁祖乾元之典合神宗同天之符  
皆四月之良辰慶九重之睿筭臣叨持使節阻造朝班  
受命無疆惟休正闌握珎符之始廸見冒聞于帝願綿  
延歷數之長

代賀壽崇節表

南陸呈祥王母介在躬之福東朝稱壽嗣皇修為子之  
恭四海懽聲一團和氣恭惟躬行柔順道體靜專充廣  
徽音天下仰姜任之懿昭垂慈訓女中有堯舜之稱矧

誕彌俱慶於兩宮而際會適先於一日臣越在外服阻  
造大廷會慶殿奉親盛舉祖宗之典華封人祝聖願殫  
臣子之忠

代衡州守賀度宗登位表

繼照四方夙啓離明之象出寧萬國時乘乾造之龍兆  
姓屬心百靈受職中賀竊以后憑玉几於昭末命之道  
揚王遺寶龜正為大厯之嗣服下立生民之命上當洪  
造之心穆穆皇皇宜君宜王繼繼承承悉臣悉主恭惟

英姿天縱潛德日昇主鬯東宮仁孝敬恭之益著負宸  
南面謳歌朝覲之皆歸天地神祇永有依華夏蠻貊罔  
不率臣濫叨小壘阻造大廷拭目望風應但知於如草  
舉頭見日嚮尤切於傾葵

賀皇太后表

嗣王時乃新位既臨於南面天下養之至禮莫重於東  
朝萬世無疆四方來賀中賀恭惟躬履節儉德益高明  
卷耳求賢審官不替憂勤之至下武貽謀翼子要皆贊

育之功乃今誕受於多方亘古獨尊於聖母宮庭雍肅  
海宇謳歌臣邈在南營遙瞻北闕莫瞻班尾載修稱慶  
之恭惟有旌心備述欣逢之盛

代湖南憲司謝登位赦表

大人繼明萬國覩龍飛之御君子宥罪八荒拜洪造之  
恩大哉王言憂以天下中謝竊以舜嗣位而肆赦象刑  
以至於無刑成即政而新民曰辟又從而勿辟越我列  
聖憲於前人皆於繼體之初先此施仁之務自天而下



如歲之春恭惟稟性寬洪宅憂恭默祖宗以有家全付  
率由舊章天地之大德曰生哀矜庶戮甫登寶位誕布  
綸音方渙風朝布於九重而解雨夕周於四海瑕穢盡  
為之盪滌獄繫毋使之滯淹雖在荒陬均蒙曠澤臣謹  
已宣揚大號遵奉寬條嘉與疲氓共觀新政衣冠無畫  
不圖還上古之淳囿圉既空恍若再成周之泰

謝皇太后表

乾龍御極東朝仰具慶之尊驛馬流星南土被本朝之

化宥過無大惟惠之懷中謝恭惟內輔先皇中興炎祚  
青宮蚤建為天下以得人洪業丕承曰吾君之有子肆  
頒大號亶謂曠恩臣越在炎荒欣逢盛際受福于其王  
母載歌女堯舜之賢好生洽于民心益進皇皞義之世  
代永州冬至節慰表

雲馭登遐方抱烏號之痛土圭測日歟增駒隙之光時  
式屆於陽生情可勝於陰諒中慰伏惟業業若虞帝嫗  
嫗如成王短郇齊喪釋尚遲於麻冕長逢周至悲莫奉

於瑤觴茂對剛辰倍深哀思臣叨承郡寄阻造班僚想  
五更三點之朝尚追思於慶禮膺十有四傳之托願少  
抑於冲懷

代永州冬至節慰皇太后表

玉簫聲遠慨天仗之遐昇綉線影長痛霞觴之莫舉一  
陽復長三殿咸悲中慰伏惟德媿媧皇志同太極儼宸  
位四十載孰不稱賢祝聖壽億萬年所期同久修驚南  
至頓隔西遊舉天下以盡傷宜皇情之悽愴臣職叨漢

郡屬忝周宗文德殿前張莫伸於賀臆長秋宮裏冀少  
抑於慈懷

代賀壽崇節表

南極陸離屬正炎衡之序東朝燕喜聿開沙麓之符慶  
溢怡愉歡騰晉率恭惟功參太極德被生民由佛地來  
同釋氏下生之旦膺皇天眷肇文王以聖之休聖節端  
臻昌期孔熾臣棲身農畝稽首宸廷祝玉隆萬壽之香  
晨昏益敬數瑤池千年之實日月彌長

代賀乾會節表

星文聚奎重際泰平之歲日度正畢誕開震夙之期慶  
衍無疆歡騰有截恭惟聰明宅下精一執中祖武克繩  
先乾元之節五日母儀是奉後聖崇之宴一朝寔鍾電  
繞之祥茂衍嵩呼之慶臣偶叨祠廩阻綴廷班祝玉隆  
萬壽之釐敢忘美報進金鑑千秋之錄尚抱微忱

代湖南倉司謝賜曆日表

歷紀龍飛四十春之景運時嚴象授三百六之初旬一

札賜書萬邦承德中謝恭惟化成恒久政察乾文璧月  
珠星驗漢史太初之奏箕風畢雨叶洛書五紀之疇王  
正又始於建寅休命有開於後甲肆頒日御以肇歲功  
臣敢不宣布上恩恪恭臣職楚鄉農事益殫平秩之勞  
周廩豐年預謹歛藏之備

代湖南倉司賀明堂慶成表

宣重光於癸亥載舉精禋新萬物於丙辛迄成熙事馨  
香一德肸蠁三靈中賀恭惟持守太平緝熙純嘏六月

喜雨適書大有之祥億年敬天爰秩無文之祝青禁聿  
司於七鬯紫壇共奉於璧圭受命溥將歛福敷錫臣屬  
縻馳隲阻效執藎多士對越在天逾想駿奔之列率土  
各以其職願賡燕享之詩

湖南憲司謝明堂赦表

重屋精裡昭格三靈之饗端門肆青率由二祖之規大  
號載馳懽聲旁洽中謝恭惟配天其澤守位以仁蠲賦  
明年益願培於邦本受釐半夜正專鄉於宸躬霑雷雨

之滿盈溥乾坤之曠蕩臣肅將使指叨被德音四十載  
措刑將畫衣而不犯六百石察吏敢奉詔以弗虔

代衡州聖節進銀表

虹流華渚載啓昌辰金貢衡陽聿修臣職前件物坤珍  
所產常賦後供旅百充庭仰祝瑤觴之慶三千同德遙  
瞻玉陛之春

天基節功德疏

堯蓂五莢載符繞電之辰漢岳三呼虔祝後天之算一



人有慶諸佛同名伏願道濟乾坤壽齊箕翼皇綱帝業  
常居一統之尊聖子神孫益衍萬年之祜

壽崇節功德疏

四月八日同佛生辰億載萬年為堯文母忝綴祝釐之  
職庸殫歸報之忱伏願行地無疆後天不老西桃三千  
年而花始實玩景瑤池南溟五百歲而葉方春齊休寶  
祚

壽崇節功德疏

景長南陸荷天之休位正東朝介福于母懼騰宇宙喜  
溢宮闈伏願山顰脩齡川增多祉以天下養嗣皇頻捧  
於玉卮極域中尊徽號又新於寶冊

乾會節功德疏

離照重明天臨諸夏乾嘉會合日紀千忱輒攄傾藿之  
心仰祝如山之算伏願與天同久如日方升四海九州  
悉主悉臣億載萬年為父為母壽齊箕翼之長

闕

代永州進明堂銀狀

九筵度尺恭逢周祀之嚴三品惟金敢效荊州之貢儀  
非及物奉謹供王前件物冶於鑿山之餘等于曰幣之  
列四海以職來祭皆共給於包茅萬寶得秋而成願告  
豐於多稔

南安郡守到任淨衙醮詞

宅生千里俯求夏屋之安皈敬九天仰竊喬雲之燾此  
心不二大造無私伏念臣某奉命分符及期祇戩聿來  
胥宇方延見吏民之初躋彼公堂懷震凌風雨之懼內

則欲托燕巢之穩外則欲安鴻宅之離况師旅飢饉之  
相仍而撫摩勞來之未易不有宏覆何以奠居爰三肅  
於玄壇庸肆陳於清醮伏願上帝臨汝至誠感神與國  
同休集四境平安之福及春將母一堂長幼之和

南安郡廳上元設醮詞

治郡罔功脩更瓜戍籲天有請輒控芹誠適元夕之屆  
期為下民而致禱伏念臣某自叨臨遣粗守廉平方寸  
地但存惟思仰不愧而俯不作一瓣香敬為所期又用

明而家用康兩年不替於撫摩千里幸歸於安靜皆由  
帝力匪曰臣能雖京兆止五日之留行將告去然刺史  
任二天之托常懼難勝

南安司理院上元設醮詞

帝德好生非得已而立法人情欲壽盖不幸而罹刑謹  
瀝丹忱仰干洪造伏念臣某自叨臨遣粗守廉平徒善  
不為徒法不行兩務剛柔之當何敬非刑何守非法一  
皆忠厚之推未嘗嚴以三尺之苛惟有寬之一分之心

伏願轉乖沴為和氣化強梗為良民雷雨之動滿盈霈  
洪恩而作解天地之間潤澤俾生意之咸豐

稼村類藁卷二十一

伏願轉乖沴為和氣化強梗為良民雷雨之動滿盈霈  
洪恩而作解天地之間潤澤俾生意之咸豐



稼村類藁卷二十一